

熙朝新語

清

徐錫麟著

第一冊

進步書局校印

新學
新學
新學
PDG

熙朝新語提要

清吳門徐錫麟撰凡十六卷自朝章掌故以及雅
詠歌謠靡不悉載据樸華溪居士錢泳序謂泳與
錫麟同輯署名金余者取兩家姓氏偏旁實無是
公也嗣以錫麟捐館泳本挂劍之意獨署其名俾
錫麟畢生辛勤不至湮然以湮尤京可作亦足稍
慰迺翁履莊序又謂歛余德水輯抑又何也

序

余自少至老以衣食奔走嘗七上京師側聞名公卿緒論仰見

國家聲明文物之盛上自

朝章掌故下逮嘉頌謹謠揚厲無前新奇可喜日有所聞難以悉數每擬筆之於書往往記憶不真歲乙亥自滇南歸里道出武昌於市肆中得歛人余德水所輯

熙朝新語一書展卷讀之與余曩昔傳聞異辭俱足互相印證其書多采諸前人著述中無一臆撰訛傳之語且又旁蒐軼事發潛闡幽凡登臨耳目所經巷議街談所及自國初至今二百年來有關於政事文章人心風俗者靡不具載亟令生徒鈔錄成帙畧加編次釐為十二卷付諸梓以公同好書名撰人俱從其舊示不敢掠美也我朝重熙累洽久道化成自今億萬斯年詞林佳話藝苑名言日積月累不可殫述續輯之作以俟將來

嘉慶戊寅春三月吳郡守瓶老人翁子敬履莊氏書

熙朝新語十六卷吳門徐厚卿明經與予同輯凡屬朝章國典聲名文物以及嘉頌謹謠有關於政事文章人心風俗者罔不該羅託名余金者蓋取兩家姓氏偏旁實

無是公也此書一出翻本盛行蘇揚坊家已有兩刻而原板反為所掩嗣厚卿筮仕河南卒於逆旅家徒四壁圖籍散亡可慨也已惟念厚卿學識有餘著述甚少因檢原本仍著其名以志挂劍之意云道光十二年三月樸華溪居士錢泳書時年七十有四

熙朝新語卷一

清 吳郡徐錫齡厚卿輯

盛京長白山為我朝發祥之地。高二百餘里。綿亘千里。山上有潭曰闔門。周八十里。鴨綠混同愛濤三江出焉。明中葉有望氣者言其地將生聖人。統一諸國。山之東有布庫里山。山下有池。曰布爾湖里。相傳有天女名佛庫倫。浴於池。浴竟有神鵲銜朱果置衣上。女吞之。遂有身。尋產一男。生而能言。體貌奇異。及長。母告之故。且命之曰。天生汝以定亂國。其以愛新覺羅為姓。語畢。母凌空去。子乘小舢。順流至河。步登岸。折柳及野蒿為坐具。端趺其上。適其地有三姓構兵不解。有取水者。奇其貌。歸告眾。走問所來。具以實告。眾驚曰。天生聖人也。舁歸奉為主。居長白山東俄漠惠之野。俄朵里城。國號滿洲。十數傳至。太祖高皇帝。英明神武。滅哈達輝發烏喇葉赫諸國。開拓疆土。建元天命。再傳至。世祖章皇帝。拯民水火。統一天下。我國家億萬年無疆之福。肇基於此。考諸往古。元鳥降祥。姜嫄履武。後先同揆。信有徵也。范文肅公文程為本朝開國元勛。文臣第一人。天命二年。文程見太祖高皇帝於撫順。偉其貌。詢知家世。謂諸貝勒曰。此名臣後也。天聰三年。從征有功。時官文館。

尚未有大學士職銜。而文肅所領皆樞密事。崇德元年。改六館為內三院。授秘書院大學士。每議大政。必資籌畫。八年。撥隸正黃旗。是歲。世祖章皇帝即位。明年為順治元年。四月。闖賊陷明北京。明山海關總兵吳三桂來乞師。遂召文肅於湯泉。決策進兵。時抱病。力疾趨。朝。建議曰。自闖寇猖狂。中原塗炭。近且傾覆京師。戕厥君后。此必討之賊也。雖擁衆百萬。橫行無憚。揆其敗道有三。逼殞其主。天怒矣。刑辱縉紳。拷剗財貨。士忿矣。掠民貲。淫人婦。火人廬舍。民恨矣。備此三敗。行之以驕。可以一戰破也。我國家上下同心。兵甲選練。誠聲罪以臨之。恤其士夫。拯厥黎庶。兵以義動。何功不成。復言好生者。天之德也。兵者聖人不得已而用之。自古未有嗜殺而得天下者。國家欲統一區夏。非又安百姓不可。於是大軍遂發。扶病隨征。申嚴紀律。妄殺者有罪。二十二日。敗流賊兵二十萬於山海關。我兵長驅而西。民多逃匿。為草檄宣諭。言義兵之來。為爾等復君父仇。非殺百姓也。今所誅者。惟闖賊官來歸者。復其官。民來歸者。復其業。必不汝害。民心遂安。師入燕京。文肅建議。首先為明帝發喪。易梓宮。備儀衛。文肅親紀其事。

國初有內三院。一國史院。二秘書院。三宏文院。各設大學士一員。學士一員。順治十

五年九月。改內三院為殿閣。一中和殿。二保和殿。三文華殿。四武英殿。五文淵閣。六內閣。十六年初。以覺羅巴納哈為中和殿大學士。額色赫為保和殿大學士。蔣赫德為文華殿大學士。洪承疇為武英殿大學士。文淵內閣未補人。裁三院學士官。另設翰林院掌院學士一員。以折庫納為之。十八年七月。復改殿閣為內三院。康熙九年。復改內三院為殿閣。復設翰林院。

天聰八年四月。太宗文皇帝。命禮部考取通滿洲蒙古漢書文義者為舉人。取中滿洲習滿書者。剛林敦多惠。滿洲習漢書者。察不害恩國泰。漢人習滿書者。宜成格。漢人習漢書者。齊國儒朱燦然。羅繡錦。梁正大。雷興馬。國柱。金柱。王來用。蒙古習蒙古書者。俄博特。石岱。蘇魯木。共十六人。俱賜為舉人。并賜衣一襲。免四丁。宴於禮部。崇德三年八月。賜新中式舉人羅碩。常焦。胡邱。阿濟格。畢禮克。圖王。文奎。蘇宏祖。楊方興。曹京。張大任。于變龍等十名。朝衣各一領。授半箇牛象章京品級。免四丁。六年七月。賜新中式舉人滿洲鄂貌。圖赫德。蒙古杜當。漢人崔光。前下三元章于天。下為鳳。綴朝衣各一領。是時取士之額雖少。名臣多出其中。

太宗文皇帝用范文程議。特選士於盛京。沈文奎登第一名。字清遠。浙江會稽人。世

居曹娥村。客遊遵化。大兵破城。挈之行。受知登第。充秘書院纂修官。順治元年。扈從入關。累官至兵部尚書。人皆知本朝開科進士第一人為傅以漸。不知實自沈文奎始也。

順治三年丙戌科狀元傅以漸。山東聊城人。授修撰。官至大學士。榜眼呂纘祖。直隸滄州人。授編修。官至侍講學士。探花李奭棠。順天大興人。授編修。官至侍郎。是科會試首題。百姓足君孰與不足。百姓不足君孰與足。次題。見而民莫不敬。言而民莫不信。行而民莫不說。三題。王道之始也。會元即李奭棠。三藝渾穆。蔚然開國氣象。二甲七十七人。三甲二百九十三人。國初諸大老。皆出此科。大學士四人。傅以漸。李蔚。魏裔介。馮溥。尚書八人。沙澄。高景。傅維麟。冀如錫。朱之弼。父元徵。魏象樞。劉捷。督撫三人。袁懋功。朱之錫。林起龍。左都御史一人。劉鴻儒。侍郎十五人。李奭棠。石闕。張爾素。陳協。王天眷。胡兆龍。梁清寬。梁清遠。田六善。楊時薦。于嗣登。朱裴。李棠馥。楊運昌。王度。左副都御史一人。董篤行。右副都御史一人。張沂。通政使二人。晉淑。載。劉士蘭。大理卿一人。王景祚。內院學士一人。夏敷九。

宛平王文靖公。熙。順治四年進士。時年甫二十。改庶吉士。習滿書。拔前列。世祖召。

見宏文院。命以滿語奏對。大加褒賞。尋陞國子監司業。累官至大學士。

先時廷對策俱用四六。順治己丑科。世祖臨軒策士。命不用四六舊套。劉子壯對策稱旨。親定一甲一名。與榜眼熊伯龍齊名。熊典試浙江。一榜得三狀元。乙未史大成甲辰嚴我斯。庚戌蔡啟傅。士林榮之。

山陰孟月心。永光。工寫真。明季薄遊遼東。後歸。本朝以畫祗候。內廷為世祖所知。命內侍張篤行受其筆法。

合肥龔尚書鼎孳。歸。本朝後頗與涿州相國齟齬。當時兩非之。後顧黃公弔尚書有云。天壽還陵寢。龍輻葬大行。義聲歸御史。疏稿出先生。浮議千秋白。餘生七尺輕。當年溝瀆死。苦志竟誰明。文人之筆。能為人文過如此。

順治己丑。探花張次修。天植。由編修至太常。轉通政。端午。世祖召入龍舟。賜宴。人稱異數。

順治七年。織造龍衣。機上有異光。三日不止。欽天監占以為一統天下政治文明之瑞。

順治壬辰會試。分滿漢為二榜。蒙古入滿州榜。漢軍入漢人榜。是科滿榜中式五十

人殿試一甲一名麻勒吉。二名折庫納。三名巴海。乙未科滿榜亦取五十人。殿試一甲一名圖爾宸。二名賈勤。三名索泰。自此兩科以後仍停滿榜。與蒙古漢榜合而為一。無錫鄒忠倚字子度。幼遊錢塘。祈夢于忠肅祠。見忠肅倚其身。授以瓜子一握。數之得五十四粒。因名忠倚。後聞居其夫人戲以瓜子排作狀元二字。壬辰會試中式五十四名。殿試果一甲一名。與夢俱合。

順治乙未冬。召日講五人進講。王熙講尚書堯典。稱旨。並命嗣後講官不必立講。遂侍坐。其後講官因得侍坐。自王熙始。

徐元棗字道力。順治乙未進士。廷試時為文敏捷。上顧見起草。奇之。及召對便殿。例舉少年習清書者中選。元棗列最後。上問其年。對曰。臣年五十二。上曰。不欺。翰林居清要。須用不欺之臣。遂用為庶吉士。

陳澤州相國初名敬。殿試榜有通州同姓名者。上命加廷字以別之。官學士時。奉命進所作詩。上覽其詠石榴子云。風霜歷後含苞實。只有丹心老不迷。誦之至再。官至大學士。仍兼經筵。故事大臣入閣。不復侍經筵。兼之者桐城澤州二相。蓋曠典也。

涿州馮文敏公銓。歸本朝。官中和殿大學士。順治十年。銓母范太夫人壽八十有七。世祖特命畫史繪銓母像。加寶璽以寵之。馮文敏公次子源濟。年十九成進士。改庶吉士。授編修。遷至秘書院侍讀學士。緣事降東城兵馬司指揮。遷淮安府山清同知。丁憂起復。授翰林院侍講。官至國子監祭酒。宦迹亦奇。無錫秦松齡。順治乙未進士。改庶吉士。授檢討。召試詠鶴詩。有高鳴常向月。善舞不迎人之句。上大加稱賞。以為有品。

蔚州魏敏果。公象樞。順治丙戌進士。由庶吉士改刑科給事中。時世祖初親政。象樞上言。宜慎起居。盡啟沃。責備時宰。人皆危之。上深嘉納。在諫垣時。疏凡三十餘上。尋因事牽涉左遷。康熙初。召授貴州道御史。具疏言。科臣余司仁。欺罔不法。湖南布政使劉顯貴。侵公帑。不當內陞。數年間。官至左都御史。劾最貪知州曹廷俞。薦舉清廉知縣陸隴其。又舉學道公明者二人。去貪墨者二人。吏治肅然。遷刑部尚書。上言。臣忝司風紀。職多未盡。敢援漢臣汲黯自請為郎故事。乞辭新命。而領現職。上鑒其無欺。從之。仍加刑部尚書銜。嘗曰。法自天子寬之。則為施仁。自刑官寬之。則為飢法。以病乞歸。御書寒松堂額。賜之以寵其行。

順治己亥會元朱錦。上海人。由庶吉士授編修。先是同邑潘尚書。有家人朱錦。其子遊庠。入謝潘。潘曰。汝子係朝廷士子。可以門生禮見。勿再論主僕也。因還其券。朱感泣。矢報。潘曰。我富且貴。安賴汝報。朱願請不已。乃曰。現今文廟圯壞。汝能修葺。賢於報我遠矣。朱欣然營繕。棟宇一新。此百餘年前事。至康熙壬子。會元公歿。同日文廟正梁朽壞。下折。刻有建造人姓名。與會元同。始知即其後身也。

順治己亥狀元徐元文。康熙庚戌探花。徐乾學。癸丑探花。徐秉義。同胞三及第。前明三百年來所未有。

馬章民。世倭。性朴素。釋褐時。貧不能具軒策。蹇驢。老蒼頭攜宮袍隨之。傳為士林佳話。

張文貞公玉書文。春容典雅。渢渢乎盛世之音。其施諾仙狼居胥山二碑。敘述

聖武神功。尤為詳贍。足以昭示萬世。紀平定江南事。紀滅閩獻二賊事。紀三路進師

下雲南事。皆端緒詳明。足以彰開國之鴻烈。紀順治間樂章及錢糧戶口三篇。皆資掌

故。紀陝西殉難官事一篇。足與史傳相參。他若遊玉泉山記。遊化育溝苑後苑記。遊

喀喇河屯後苑記。遊熱河後苑記。皆足掄揚太平愷樂之象。其餘碑誌亦多。國初

將相事迹可備考。

益都馮相國溥。二十一歲鄉舉報到。酣眠不醒。太夫人大驚。以水噴面。乃張目曰。夢登泰山。雲氣擁身而行。至一殿上。碧霞元君迎之。置錦幔。張樂飲酒未終。見海日如車輪。大驚而醒。醒時猶帶酒氣。

順治癸巳正月十八日。夜大風。山東恩縣祁村陂中。冰卓立成山。廣四丈。高二丈許。峯巒秀拔。谿壑迴環。一磴委蛇相通。觀者雲集。造物之巧。有不可思議如此者。

即墨藍見渚潤。順治丙戌進士。官翰林。性廉介。不異儒素。故事直隸江南。皆以臺員視學。世祖特簡詞臣。以潤為安徽學使。盡剔積弊。上謂廷臣曰。居官如藍潤。可法也。會直省監司多不稱。上以翰林官習法度。以潤品行端方。出為福建參政。此詞臣為監司之始。

嘉善曹子顧爾堪。順治壬辰進士。改庶吉士。授職編修。召試瀛臺南院。上霽顏。

顧問久之。嘗與吳學士偉業等。同注唐詩。書成。稱旨。特被褒獎。儒林以為佳話。

順治十四年二月。給事中張文光言。魯哀公誅孔子曰尼父。漢平帝元始元年。加諡曰宣尼父。後魏太和十六年。改諡文聖尼父。唐太宗貞觀十二年。尊為宣聖尼父。明

皇開元二十一年。始進謚文宣王。元武宗至大元年。加謚大成至聖文宣王。明嘉靖九年。改為至聖先師孔子神位。前祭酒李若琳。不加攷訂。請易為大成至聖文宣先師孔子。不過仍元武宗舊謚而不稱王耳。臣謂大成文宣四字。豈足以盡孔子。請仍改至聖先師孔子神位。上從之。

徐立齋元文。為諸生時。赴試金陵。船家一啞子見之。忽迎笑曰。狀元來矣。後果如其言。造一船與之。俾溫飽終身。立齋官修撰時。嘗從幸南苑。賜乘御馬。命學士折庫納執鞭。乃元文館師也。遂謝不敢。乃改命侍衛。又嘗晚對便殿。夜分。賜饌。世祖又問從者得毋饑乎。命侍衛與之食。嘗被命進孚齋說一篇。孚齋世祖讀書所也。上賜覽稱善。為刊行之。

順治戊子。順天鄉試。第四名張永祺。壬辰榜眼。第五名戴王綸。乙未榜眼。第八名熊伯龍。己丑榜眼。同榜三榜眼亦奇。

鎮國公敬一主人。世祖章皇帝之庶兄也。居瀋陽。性淡泊。如枯禪老衲。好讀書。善彈琴。工詩畫。精曲理。樂與文士遊。以康熙九年七月薨。著有恭壽堂詩。

法黃石若真。母夢應真入室而生。故名若真。學問淹博。順治乙酉。以五經中式。丙戌。

成進士。由編修再遷祕書院侍讀。與時相不合。外用浙江道調福建。禦鄭寇有功。遷浙江按察使。平反王式誣告案。浙人詫為神明。

新城傅麗農。展修軀偉貌。鬚眉如戟。博學強記。嘗過一友家。其女為狐祟。聞傳至曰。傳公正人。將來必責吾去矣。果不復來。傳中順治乙未進士。官至江西道御史。

國初時。山東有李神仙者。遊行京師。庚子北闈。鄉試前有兩生密詢試題曰。公等皆道德仁藝中人也。無庸卜。題出。乃志於道全章。辛丑會試。又有以場題問者。李曰。五後四可。場中首題。乃知止而後有定一節。次題。乃夫子之文章一章。三題。乃易其田疇二節。果五後字四可字。

吳縣黃端木向堅。父孔昭。作宰滇中。姚江道梗不得歸。向堅於順治八年十二月。徒步出門。涉歷艱險。周徧於猺獞之地。跣足鰲面。至白鹽井。始遇二親。以十年六月歸里。承歡二十年。父母歿。負土營葬。不再期。得疾以殉。世稱完孝。好事者為譜三溪記傳奇。至今世多演之。

趙恒夫吉士。讀書靈隱。偶憩冷泉亭。見文宗屏去騶從。攜一小童入寺。良久步行去。寺僧告趙云。黃公以尊名問僧。遽與文宗云。寺中有一士。予未識其面。夜過午。書聲

不輟當培植之。文宗唯唯而去。僧來報喜也。趙詢之方知所僦居之旁。有黃中丞鳴俊者。係文宗房師。避靜寺中。絕無人知。前輩之敘迹韜光而不憚提獎後進如此。向容筮重光。未第時。夢其父曰。汝功名在朝天宮某道士身上。覺而異之。訪其人與訂交焉。既而辛卯金陵填榜。即某道士也。拆卷到筮官欲易之。道士已聞唱直書官呵曰。爾知筮字如何寫。道士曰。竹下加旦字。官曰。數也。

國初時。浙江用兵。諸暨陳氏女。年十六。被地匪所掠。逼之不從。杭人郭宗臣未瞻生尚御公者。方初義。釀金贖難民。聞女之貞。亟贖之。方至家。忽友人贖一童子至。問之。即其夫也。翌日贖兩姬。即其母與姑也。正驚喜。訊問。有兩翁踉蹌至。覓其妻。蓋即女之父與翁也。兩家骨肉。一時完聚。人皆以為貞節所感。三人為之治酒肴。具衣帔。合卺而歸之。高義亦足多也。

五岳皆祭於山。獨恒岳祭於曲陽。自漢宣帝神爵元年始。而恒山實在渾源州。相傳舜望於山川。北至大茂山。大雪不能前。有石飛墮。遂祀焉。即今曲陽廟。石長不滿丈。濶僅四尺餘。濮陽蘇侍郎穀疑石晉後燕雲陷遼。宋遂遙祀於此。然史漢唐書之文甚明。不始宋也。沈存中筆談云。北岳謂之大茂山。半屬契丹。以大茂脊為界。岳祠舊

在山下。石晉之後。稍遷近內。今祠乃在曲陽。蘇說本此也。明宏治中。馬端肅公曾請改祠於山。事下禮部。竟格於倪文毅公。按南園漫錄云。倪公父謙奉命祀曲陽。禱於神。神指旁侍一人與之生公。因名岳。以是固執不肯改祀云。順治十七年。上允刑科給事中粘本盛之請。罷曲陽廟祀。改祀渾源。千年因循之誤。至是始釐正焉。順治甲午。四明金良於鄉試前夢見天榜。解元乃金良也。寤而喜甚。及揭曉。解元乃鍾朗。夢中僅見其半耳。又己亥八月再行會試。朱若臣士綬夢看榜。會元朱姓。單名金字偏傍。左邊不甚了了。因具呈禮部。更名銘。榜發。會元則朱錦也。二事相類。豈神或戲之與。不然。何其巧也。

賽圖字麟閣。滿洲科目解元。幼貧。嘗煮馬通讀書。尤好為詩。滿洲文學之開。實自賽公始。而滿洲文字。則創於達海公。故諡曰文成。

金壇蔣虎臣超。順治丁亥探花。以編修督學順天。事竣即告歸。不過里門。沂巴峽至峨眉。寓伏虎寺。至癸丑正月。端坐說偈而逝。初生時。其祖母夢峨眉老僧至其家。故幼不如輩。至是果驗。

劉克猷子壯。少穎慧。讀書一目數行。屬文奇肆。中崇禎庚午舉人。領薦後。夢神告之。